

تسرد هنا شهادة امرأة سنشير لها بالأحرف (أ.س.س)، وتبلغ من العمر 36 عامًا، من غزة، تركت المدينة قبل عامين. ولكن عائلتها كلها داخل غزة، وأخت زوجها أيضًا.

أنا خرجت بعد الحرب عام 2022، خرجت بسبب الحرب. الصاروخ كان يمسي ويصبح كل حرب. بكل الحروب كنت أشتغل منتجة ومعدة تقارير إخبارية، بحرب 2008، وقتها ما كنت متزوجة وكان عندي وقت. تزوجت عام 2019، ما كان عندي مشكلة أبقى لما ما كنت أم، لكن لما صرت أم وهذا عام 2020 وصار عندي أطفال صار صعب جدًا، أكون أمينة على أطفالي، لما أجت الفرصة إني أطلع فطلعت، بسبب الحرب.

بنحكي عن مسافات متقاربة، لو صار قصف بمربع X بتهدد مربع كامل، بنحكي عن حزام ناري، بهدد مناطق كاملة.

النساء بتطلع والرجال بتضل، باعتبار بنحب نأمن النساء. لما أهلي تركوا بيتنا تم تدمير البرج بشكل كامل، أختي دمروا بيتها، وأختي الثانية دمروا بيتها. راحوا على بيت أخوي، راحوا على خانيونس بعدين نزحوا الرفع. عملية النزوح كانت بدمار. كل بيوتنا مدمرة.

صاحبتني كلمتني قبل 3 أسابيع، خبرتني "أنا لا أملك حق فوط صحية". موجود فوط بكميات شحيحة ومحدودة، وبمناطق عينية، واضربي سعرها بكثير. نساء إللي زيها، بعتلي لأنني بشتغل بمبادرات، بتستناني أحاول أدبر إشي. ستات تانية بتروح ع المدارس، ع الصيدليات لو كان معهم فلوس، عشان يحاولوا يحصلوا على فوط صحية.

نعيش ونحكي

شهادات نساء من غزة

صاحبتني لما كلمتني عن الأولوية (الفوط الصحية) قالتلي "عفوا". وأنا قتلها الأولوية إشي عادي بالحياة. يعني ممكن واحدة تقول لأخوها، تطلب فوط، بتحكي بمليون ألف طريقة و بتقول لأمها بالأول.

الستات والبنات وجدوا طرق تانية، مجرد لان الموضوع ممكن يكون شوي معقد مجتمعيًا، في حوله تحفظ، كثير بنات بكونوا متحفظات وما يحكوا ع الموضوع. هذا التحفظ انكسر بشكل كبير. بتنامي بمدرسة وما في خصوصية، بتنامي بيت ما بتعرفي حدا فيه، نازحة. ممكن نازحة مستأجرة بيت رجل ما بتعرفيه بتانًا. خيمة بتتشاركها مع كمان ناس. ما في فاصل، ولا حدود علاقات. كل شي بغزة مهدوم ومعدوم الخصوصية.

عشان تفوتي ع التواليت بالمدرسة، بتصفي بدور كبير جدا. وكل أمة لا إله إلا الله بتعرف إنك رايحة ع الحمام.

في إحدى الحالات إللي عم تمرق ع شريط مخيلتي، امرأة بعرفها، موجودة عند جماعة أصحاب، أول أسبوع كان الوضع كثير تمام، ثاني أسبوع طولوا الجماعة، بدأ يصير عدائية تجاههم، الست الللي معهم بنفس البيت كانت تتعامل بطريقة الله يسهل عليكم. مش بس انهدمت الخصوصية، كمان إزدلال للناس، طولتوا بالله روحوا. طب وين نروح، ما عنا بديل.

المرأة النازحة عند العائلة بتطبخ لحال، والمرأة صاحبة البيت بتطبخ لحال. كثير أوقات يمنعوا الأطفال يطلعوا من الغرفة، ممنوع يطلعوا ع الصالة. طلبوا يعملوا خبز، قالولهم ما بضبط.

نعيش ونحكي

شهادات نساء من غزة

بالمدارس، عن بكرة أبيها، موجود تحرش جنسي، أي مكان بصير فيه تجمع كبير، حتى بهاي الظروف. بالنكسات وبالحرّوب تبين فيها مين منيح ومين عاطل.

بصير في تحرشات واعتدات، بس زكرت من أكثر من شخص مصادر موثوقة ومش ناس بتألف، واحدة بعرفها طلعت من المدرسة بعد 3 أيام، وراحت عند جماعة تانيين، قالتلي هاي حاجة مش ممكن أحكي فيها. وهي قصدت عن الاعتدات الجنسية. مش لازم نخجل منه أو نخيبه، لعلّي وعسى يبطلوا.

أختي رفضت تودي أولادها ع المدرسة، من كمية الأشياء المدرجة بالمدارس، موضوع التحرش والنظرات حتى لو نظرة هو تحرش. بناتها صبايا 17 و18 سنة. اضطرت تطلع، وبعثت بناتها لحالهم ع بيت بتأمن عليهم فيه، وما يتعرضوا لأي شيء، نفسي أو جسدي أو تحرش وهي زوجها بالمدرسة. وكل يوم من بيت لبيت، بالنهار بيت، بالليل بيت تاني.

ما في رقابة، مدارس بالألوفات، ما في أمن، كل شيء متاح ومباح. لو ما عندك رقابة ذاتية، فكل شيء بصير متاح أمامك. إليلي مش خايف من الله بالأيام العادية، شوبده يخوفه من القصف. بتطمن ع أهلي بشكل يومي، برفح حاليا في إمكانية كيف أتطمن عليهم. من يوم التنين بالنصيرات، ما كلمت أختي، ما في إنترنت. لما كانوا بخانيونس ما كنت أكلم.

نعيش ونحكي

شهادات نساء من غزة

كل شي بنقص عليهم، بامبرز و حليب، ناقص لبس شتوي. بعنت أكثر من حدا أفحص خيارات موجودة، البضاعة شحيحة جدًا. ابن اختي سنتين، عملت حملة لكسوة، وأخوي كان يشتغل بمؤسسة، ونجح يدبر اشي. ما في جاكيتات أو اشي، مش قادرين يوفروا أي شي.

ماما وبابا بطلبوا أوفر لهم النواقص حتى لو ما كانت كاملة. لما بكلمك حدا منهم وبقولك جعبالى أشرب "نس كافيه"، هو أبسط الأشياء اللي ممكن الواحد يفكر فيها، تخيلي كيف بطلب مساعدة لنس كافيه، أو اختي تقولي ابني حابب تشيبس. أتفه وأبسط الأشياء. بفتح عيني وبنام، وبفكر، مين ضل معه مصاري، متذكرة امتي قبضوا، وقديش ممكن ضل معهم، تخيلي احنا قاعدين بندرس بظروف احنا ما بنمر فيها، كأني بعمل جدول مصروفي الشخصي، بس هو مش إللي، كمان لناس قاعدة جوا، بس مش موجودة الأشياء. الملح كان بشيكل، اليوم بـ 17، وممكن هلا تضاعفت أصلاً. علبة جبنة بـ 2 شيكل، وصلت 5-6 شيكل. كيس طحين فيه 25 كيلو- وصل سعره 270 شيكل، كان 45 شيكل. 50 كيلو، 70 شيكل هلا 200 دولار، هادول كان ممكن يكونوا معاش شهري بأيام ما قبل الحرب.

كل الوقت أنا بفكر عنهم، الحالة كأنهم مشلولين، إيد وإجر فش. موجودين بمكان بعرفوش فيه حدا، ما في ناس بنعرفها. الجماعة اللي أهلي راحوا عندهم، كان مطبخهم صفر. اتوا سكنوا ووفروا إللي تقدروا عليه، والعيلة بتوفر مسكن.

نعيش ونحكي

شهادات نساء من غزة

تغيير وظائف جنديرية، بموضوع النزوح زمان كان الإشي بموضوع الرجل، هلاً بهاي الحرب اختلفت، وتبدلت الأدوار، اليوم أنت لا تملك حق تقرير مصير حياتي، أختي بتقولي "أنا خايقة ع أولادي وبدي أطلع، في دور تفوتي التواليت- كان كثير ناس بالبيت" فقررت ترجع ع بيتها، وكان قرار منها ومش زوجها. لما انفهم انه خلص فش مجال يبقوا صار قرار مشترك. أختي قادرة تقروين تكون رخم زوجها. وهي بتقول إنه "مش مستعدة أروع ع محل فيه كثير نساء وتنعدم خصوصيتي أو مكان فش فيه مي".

الناس يمكن ما بتنتبه لا شيء، السؤال شو شعورك وشو بتحس وأنت برا وأهلك جوا؟ أنا شو بدي أحس، يعني حطوا حالكم مكاني. أهلي جوا ممكن ينقصوا. ما تسألونا هذا السؤال. عنا جروح وما تديروا علينا بنزين.

أنت كلمتيني، وأنا بدي أفرغ اللي جواتي. أنا هاي الفترة بحكي بصوت عالي، في كثير أشياء نفسنا نحكي فيها. وإحنا أبداً مش مناخ، والناس اللي برا عاملة حالها كثير قوية، وبتساهم بتوفير احتياج هون، وتساعد، وتسد هون. محدش بسألنا كيف حالكم، شو ناقصكم، شو وضعكم؟

نعيش ونحكي

شهادات نساء من غزة

كل مرة فقدت فيها الاتصال مع أهلي، صحيت على خبر استشهاد
حدا. في أول انقطاع للشبكة، استشهد خالي ومرته وأولاده. المرة
التانية، صديقتي الأتيم (المقربة) من 28 سنة، شبينة فرحي. أنا
لليوم ما أخذت المتسع أحزن عليها، لو بدي أقعد أستوعب وأحزن
عليها، في 4 عائلات مارح تقدر تاكل.

بنجز كثير أشياء، وبحس حالي ما عملت إشي وضایل كثير أشياء.
يُمارس علينا قمع، بقولولي "أنت كثير محملة حالك فوق طاقتك"
أنا بس حاسة بالمسؤولية. في نوع من المسؤولية الإنسانية،
والأخلاقية. الاحتلال اشتغل ع تدمير البنى التحتية كمان بالأخلاق.
أي مناقشة بتيجي من أشخاص، حتى لو من ناس أذوا ناس
بخصوني، ما بقصر.

تم الحصول على هذه الشهادة بشكل مباشر من المرأة بواسطة إجراء مقابلة معها في تاريخ 13.12.2023

نعيش ونحكي

شهادات نساء من غزة